

दिनांक 16.06.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी लोगों ऊं नियमित योगाभ्यास करण री करी अरज-प्रदेश मांय ई अन्तर्राष्ट्रीय योग दिवस ने ले र करी जाय री है तैयारियां।
- विधि अर न्याय मंत्री अर्जुन राम मेघवाल कह्यो-एक जुलाई ऊं लागू होवण वाळा तीन नुवां आपराधिक कानूनां रो मकसद लोगों ने बेगो न्याय देवणो।
- मुख्यमंत्री भजन लाल शर्मा प्रदेश मांय 4 सोलर प्रोजेक्ट सारू भूमि आंवटन रा प्रस्तावां ने दी मंजूरी ।

अर

- प्रदेश मांय गंगादशमी रे मौके न्यारा-न्यारा धार्मिक आयोजन।

000

प्रधानमंत्री नरेन्द्र मोदी लोगों ऊं योग रा फायदा लेवण सारू बरोबर योगाभ्यास करण री अरज करी है। प्रधानमंत्री आज सोशल मीडिया माथे योग करता आप रो एक वीडियो साझा कर्यो। वणा वीडियो मांय पादहस्तासन रा बारा मांय जाणकारी दी। वटे ई, प्रदेश मांय आवता 21 जून ने होवण वाळां अंतर्राष्ट्रीय योग दिवस रे मौके न्यारी-न्यारी ठौड़ां माथे योग सप्ताह अर योग महोत्सव व्हेला। नगर निगम जयपुर ग्रेटर कानी ऊं चाल रह्या महोत्सव मांय आज ऊं योग अभ्यास सारू व्ह्यो। इण मांय बिना रूक्या 1500 मिनट ताई योगासन करवायो जावे। भरतपुर मांय जिला थर रा जळसा री सगळी तैयारियां पूरी कर लीरीजी है। पुलिस ग्राउंड मांय होवण वाळां जळसा मांय तीन हजार ऊं बत्ती लोग एक साथ योगाभ्यास करेला। **भीलवाडा** मांय योग दिवस री केई ठौड़ा माथे तैयारियां करायी जावे। रोज गांवां अर शहरां मांय योग रा कार्यक्रम व्हे रह्या है। जिला थर रो खास आयोजन भीलवाडा रा राजेंद्र मार्ग स्कूल मांय व्हेला। **बूंदी** मांय आज ऊं 5 दिन रो योग शिविर सारू व्ह्यो। पुलिस परेड ग्राउंड रा चंद्रप्रकाश स्टेडियम मांय चाल रह्या शिविर मांय पुलिसकर्मियां योगाभ्यास कर्यो।

000

केन्द्र सरकार 'आपराधिक न्यायिक प्रणाली प्रशासन में भारत का प्रगतिशील पथ' मुद्दा माथे आज कोलकाता मांय सम्मेलन राख्यो। केंद्रीय विधि अर न्याय मंत्री अर्जुन राम

मेघवाल सम्मेलण रो उदघाटन कर्यो। वणा कह्यो के तीन नुवा आपराधिक कानून लोगां ने बेगो न्याय दिरावण सारू बणायी ज्या है। श्री मेघवाल कह्यो के देश रा हालात अर बगत मुजब कानूनां मांय बदलाव री जरूरत होवे है। श्री मेघवाल कह्यो के देश रा केई तबका कानी ऊं, ब्रिटिश बगत रा आ कानूनां मांय बदलाव री मांग करी जाय री ही ।

श्री मेघवाल कह्यो के अ कानून देश रा सगळा राज्यां, केंद्रशासित प्रदेशां, कानून लागू करण वाळी एजेसियां अर इण ऊं जुड्यां सगळा लोगां री सलाह लेवण रे पछे बणायी ज्या है।

केंद्रीय विधि अर न्याय सचिव राजीव मणि, केंद्रीय विधि आयोग री सदस्य सचिव रीता वशिष्ठ नुवां कानूनां रा न्यारा-न्यारा महताऊ पहलुआं माथे चर्चा करी। ध्यानजोग है के लारली साल दिसंबर मांय राष्ट्रपति आ कानूनां ने मंजूरी दी ही।

000

आकाशवाणी समाचार जयपुर कानी ऊं प्रादेशिक समाचार बुलेटिनां मांय तीन नुवां आपराधिक कानूनां रा बारा मांय जाग-जगावण रा मकसद ऊं कड़ी चलायी जाय री है। इण रे तैत आज जाणा नुवां आपराधिक कानूनां मांय फॉरेंसिक ने बढ़ावो देवण रा बारा मांय करी ज्या कानूनी प्रावधानां रा बारा मांय-

7 साल अर इण ऊं बत्ती री सजा रा प्रावधान वाळा सगळा अपराधां मांय फॉरेंसिक ने जरूरी करी ज्या है। जांच रा कामां मांय वैज्ञानिक तरीकां ने बढ़ावो दियो जायेला। नुवां आपराधिक कानूनी प्रावधानां मांय दोषसिद्धी री रेट ने 90 फीसदी ताई बधावण रो लगस राख्यी ज्यो है। सगळा राज्यां अर केन्द्रशासित प्रदेशां मांय फॉरेंसिक तरीका ने जरूरी बणायी ज्या है, इण सारू पांच साला मांय राज्यां अर केन्द्रशासित प्रदेशां ने बुनियादी ढांचो तैयार करणो व्हेला। लोगां ने सिखावण देवण सारू राज्यां मांय फॉरेंसिक साइंस विश्वविद्यालयां री सरूआत करी जायेला।

000

राज्यपाल कलराज मिश्र आज जयपुर मांय आगरा रोड रा श्री लक्ष्मीनारायण मंदिर पूग र पूजा-अर्चना करी। श्री मिश्र वठे भगवान लक्ष्मीनारायण री स्तुति करी। मंदिर परिसर मांय वणा भगवान शिव रो विधा विधान ऊं अभिषेक कर ने देश री खुशहाली अर समृद्धि सारू कामना करी।

000

मुख्यमंत्री भजन लाल शर्मा आज ब्यावर रा आशापुरा माता मंदिर मांय व्ह्या भेळा ब्याहव सम्मेलण मांय भेळा व्ह्या। श्री शर्मा ई मौक मंदिर मांय पूजा-अर्चना करी। पछे मुख्यमंत्री आमसभा मांय भाषण कर्यो। वणा भेळा ब्याहव जळसा ने बधावो देवण री जरूरत माथे जोर दियो। वठे ई मुख्यमंत्री राज्य सरकार री जन कल्याणकारी योजनावां रो जिक्रो करता कह्यो के वे जो वादा कर्या है वा ने पूरा कर्या है। वणा कह्यो के सरकार महिलावां रा सशक्तिकरण सारू संकल्पित है।

ई मौके जल संसाधन मंत्री सुरेश रावत अर सामाजिक न्याय अर अधिकारिता मंत्री अविनाश गहलोत ई मौजूद रह्या।

000

मुख्यमंत्री भजन लाल शर्मा प्रदेश मांय 4 सोलर प्रोजेक्ट सारू जमी आंवटन रा प्रस्तावां ने मंजूरी दे दी है। इण रे तैत बीकानेर रा पूगल अर छत्तरगढ तहसील मांय 2450 मेगावाट

रा 3 सोलर पार्क थापित व्हेला। वठे ई फलौदी रा भडला मांय 500 मेगावाट रा एक सोलर प्रोजेक्ट री ई थापना व्हेला। प्रस्ताव मुजब बीकानेर ज़िला मांय 24 सौ 50 मेगावाट रा 3 सोलर पार्का री थापना सारू राजस्थान सोलर पार्क डवलपमेंट कंपनी ने कुल 47 सौ 80 हैक्टेयर अर फलौदी ज़िला मांय 500 मेगावाट रा एक सोलर प्रोजेक्ट री थापना सारू एनटीपीसी रिन्यूएबल एनर्जी लिमिटेड ने कोई 9 सौ 10 हैक्टेयर जमीन आवंटन ने मंजूरी दीरीजी है। अ सोलर पार्क 3 चरणां मांय विकसित कर्या जायेला। मुख्यमंत्री भजनलाल शर्मा कह्यो के आ सोलर प्रोजेक्ट्स री मार्फत राजस्थान ने ऊर्जा रा हलका मांय आत्मनिर्भर बणावण रो संकल्प साकार व्हेला अर ओ प्रदेश रा विकास मांय मील रो पत्थर साबित व्हेला।

000

प्रदेश मांय आवता आठ अगस्त ने अमृत पर्यावरण महोत्सव रे तैत घणी तादाद मांय पौध रोपण कर्यो जायेला। पाली दौरा माथे पूग्या पंचायतीराज मंत्री मदन दिलावर बतायो के आ पौधां री देखभाळ मनरेगा मजूरां कानी ऊं करायी जायेला। इण ऊं चार लाख मजूरां ने रुजगार मिलेला। वणा कह्यो के राजस्थान मांय बधता तापमान ने रोकण सारू पौधां लगावणो जरूरी है। पेड-पौधां लगावण ऊं पर्यावरण संतुलन बणावण रे साथै ई बिरखा सारू ई वातावरण तैयार होवे है।

000

प्रदेश मांय आज गंगा दशहरा पर्व रे मौके न्यारा-न्यारा धार्मिक अनुष्ठान व्हे रह्या है। संवारा ई गंगा माता मिनदरा मांय खास पूजा करी ज्यी। वठे ई पवित्र सरोवरां मांय श्रिद्धालु स्नान कर रह्या है।

जयपुर रा गलता तीर्थ मांय घणी तादाद मांय श्रिद्धालु स्नान कर ने पूजा अर्चना करी। भरतपुर रा नामी गंगा मिनदर मांय फूल बंगला झांकी सजायी ज्यी। डीग मांय तीर्थराज विमल कुंड मांय स्नान करण सारू घणी तादाद मांय श्रिद्धालु पूग्या है। ई सारू ज़िला प्रशासन कुंड मांय चंबल रो पाणी छोड्यो है। अजमेर ज़िला रा पवित्र पुष्कर सरोवर मांय घणी तादाद मांय श्रिद्धालुआं स्नान कर ने दान-पुण्य कर्या। सवाईमाधोपुर ज़िला मांय गंगा दशहरा रीत मुजब मनायो जावे। वठे ई जैसलमेर ज़िला मांय रामदेवरा मांय दशमी रे मौके बाबा रामदेव री समाधि रा दर्शन सारू संवारां ऊं श्रिद्धालु पूग रह्या है। मुख्यमंत्री भजनलाल शर्मा सोशल मीडिया संदेश री मार्फत लोगां ने गंगा दशहरा री शुभकामनावां दी है।

000

प्रदेश मांय दाऊदी शिया बोहरा समुदाय आज ईद उल अज़हा रो तिवार रीत मुजब मना रीया है। झालावाड ज़िला रा झालरापाटन अर सुनेल खानपुर मांय संवारां बुरहानी मस्जिद मांय ईद री नमाज़ अदा करी ज्यी। लोगां एक-दूजा ने ईद री मुबारकबाद दी। राज्यपाल कलराज मिश्र प्रदेशवासियां ने ईद-उज-अजहा माथे बधाई अर शुभकामनावां दी है।

000

डीग ज़िला री ग्राम पंचायत सोनगांव री सरपंच आशा कुमारी लोधा ने भारत-भूटान अंतरराष्ट्रीय अवार्ड ऊं सम्मानित करी ज्या है। वां ने ओ सनमान जयपुर मांय रोटरी भवन सभागार मांय व्ह्या जळसा मांय भूटान रा उपराष्ट्रपति दियो। ई मौके वां ने सोना रो तमगो अर प्रतीक चिन्ह दीरीज्यो।

.....

000

प्रदेश रा आगुणी हलकां मांय लारला 24 घंटा मांय कठे-कठे ई हल्की बिरखा व्ही। मौसम मेहकमा मुजब काले बीकानेर अर जयपुर संभाग मांय कुछ ठौड़ा हीटवेव चाली। राज्य मांय सब ऊं बत्ती 45 दशमलव 8 डिग्री सेल्सियस तापमान पिलानी मांय दर्ज व्हयो। धौलपुर, चूरू, श्रीगंगानगर अर भरतपुर मांय पारो 45 डिग्री ऊं ऊपर रह्यो। मौसम केन्द्र जयपुर आज अर काले कोटा अर उदयपुर संभाग मांय कठे-कठे ई बिरखा होवण री आस जतायी है।

000

प्रधानमंत्री नरेंद्र मोदी ई मीना री 30 तारीख ने आकाशवाणी रा 'मन की बात' कार्यक्रम मांय आप रा विचार साझा करेला। आं ई मासिक रेडियो कार्यक्रम री 111 वीं कड़ी व्हेला। श्री मोदी रे तीजे कार्यकाल रो ओ पैलो एपिसोड व्हेला। ई कार्यक्रम सारू सुणण वाळां आप रा विचार अर सुझाव टोल फ्री नंबर 1800-11-7800 री मार्फत दे सके है। इण रे अलावा नमो एप अर माय जी ओ वी ओपन फोरम री मार्फत ई आप रा विचार साझा कर सके है। ई कड़ी सारू 28 जून तांई सुझाव भेज्या जा सके है। मन की बात कार्यक्रम आकाशवाणी अर दूरदर्शन रा सगळा नेटवर्क, न्यूज ऑन एआईआर वेबसाइट अर मोबाइल एप माथे सुण्यो जा सके है। इण ने आकाशवाणी समाचार, डीडी न्यूज, पीएमओ अर सूचना अर प्रसारण मंत्रालय रा यूट्यूब चैनला माथे ई लाइव स्ट्रीम कर्या जायेला।

000

केन्द्रीय गृह मंत्री अमित शाह अमरनाथ यात्रा री तैयारियां रो जायजो लेवण सारू नुवी दिल्ली मांय ऊचा थर री मीटिंग करी। इण मांय राष्ट्रीय सुरक्षा सलाहकार अजीत डोभाल, जम्मू-कश्मीर रा उपराज्यपाल मनोज सिन्हा अर केन्द्रीय गृह सचिव अजय भल्ला, सेना प्रमुख जनरल मनोज पांडे अर पदेन सेनाप्रमुख जनरल उपेन्द्र द्विवेदी समेत सेना अर प्रशासन रा ठांवा अहलकार हिस्सो लियो। सालाना अमरनाथ यात्रा ई मीना री 29 तारीख ने सरू व्हे र 19 अगस्त तांई चालेला। इण ऊं पैला गृहमंत्री जम्मू-कश्मीर री हिफाजती बन्दोवस्तां ने ले र मीटिंग री सदरत करी। बैठक रे दौरान श्री शाह अजै ई केन्द्र शासित प्रदेश मांय व्ह्या आंतकी हमला ने ले र हिफाजती बन्दोवस्ता री समीक्षा करी।

0000